

K'ipa PEDRO

2 Pedrobi kallari parluguna

Tandanukushka crijkunada llakichi kallarikimi Jesús agllushka Pedroga tuki crijkunamu kai cartadaga kachasha Jesucristo wacharishka k'ipa sujta chunga kanchis (67) wata shinabimi esribishka yuyachin. Pandachingu nisha llullasha yachachijkunamunda wakichirichun nishami kai librobiga jinchida rimasha, Diosbuj Shimi allidi gashkada rikuchisha esribishka.

Shuj yachanagunaga kaibi tiyan: llullasha yachachijkuna tukuchishtaj shujtij yachachinagunada pakalladami waiguchingaguna (2.1-22), Mandajka pish ama wañuchun nisha ashtanbish juchada sakisha Diosmu vueltachun nishami ñukuchida gushtulla shuyagun (3.1-13).

Pedro saludashkamunda

1 ¹Jesucristo agllasha kachashka shinaidi Paibuja ruruj Simón Pedro-mi gani. Ñukuchij Dios Kishpichij Jesucristo kabishkada ruruj gashkamunda ñukuchi layaidi k'uilla crinada mashnalla japijkunamumi esribini. ²Diostash ñukuchida Mandaj Jesustash alli rijsikunamunga, Dios kushka alligunash k'uilla kausish kangunabi kutin kutin mirarichun.

Crijkunamunga imalla ministishkada kushkamunda

³Diosga Pai k'uilladi gashkan allilladi rurushkagunanbish ñukuchi-da Kayajta rijsishkamunda Dios yuyilla gasha kausachun Pai tukida ruri pudishkanmi tuki ministishkagunadash kushka. ⁴Kashnagunada rurushami k'uillati shinaidi manchanaidi valij Pai 'Kushami' nishkagunadaga kushka; chigunanga kai pachabi tiyaj milli munigonada kazusha llaki tukunamunda anchorishka jawa, Dios ima layami gan shina layaidi gachunmi chidaga rurushka. ⁵Chillamundadimi, ña crijkuna gashkamundaga tuki jursan gasha tukibi allilladi rurujkuna gaichi; ña allida ruruj gashaga intindijkuna ganadash mirachichi; ⁶ñá intindij gashaga na alli ruranamunda jarkarinadash mirachichi; ña jarkarij gashaga na shaikurishalla jinchi katinadash mirachichi; ña jinchi katij gashaga Dios yuyilla ganadash mirachichi; ⁷ñá Dios yuyilla gashaga shujkunada

waukindij panindijma shina llakinukuj ganadash mirachichi; ña llakinukuj gashaga tukigunada k'uyajkuna ganadash mirachichi.

⁸Kaiguna kangunaj kausibi gashaga ashtan ashtan p'aktachigukimi ñukuchida Mandaj Jesucristoda rijsinabiga kangunabi ama yangallama grano illujmash sakirichun chigunaga rurachinga. ⁹Maijinsh kaigunada na charijka shuj cigu shina karuda na alli rikujmi gan; paibuj ñaubadi juchagunada linshuyachishka gashkadash ña kungarishkami. ¹⁰Chimunda wauki paniguna, Dios kangunada kayashkadash agllashkadash pish na kuyuchibujtadi rurungu manchanaidi munajkuna gaichi. Tuki kaigunada shina rurashaga naidi urmunguichichu. ¹¹Shina gakimi ñukuchida Mandaj shinaidi Kishpichij Jesucristoj na tukuribuj mandanamu waiguna pungudash kangunamu illujlladati paskush kunga.

Pedro rishka k'ipash yuyarinamunda

¹²Shinushami kanguna kaigunadaga ña yachakish shinaidi kunun-gama kabishkada yachachishkabi jinchi shayarijkuna gakish, ñukaga kangunamu yuyachisha katinadaga naidi sakishachu. ¹³Ñuka kai cuerpo-bi kausashkagama kaigunada ninaga kabinlladimi yuyasha, kangunada takush nisha yuyachigushallami. ¹⁴Ñukuchij Mandaj Jesucristo ñukamu yachi chayachiki kai kausida ñalla sakinashkada yachanimi. ¹⁵Shinusha ñuka llujshish rishka k'ipash kai imalla nishkagunada kanguna tuki ratush yuyarichunga chidadi p'aktachingumi yuyillandi ruramuguni.

Diosbuj Shimiga kabishkadi gashkamunda

¹⁶Ñukuchij Manduj Jesucristo tukida ruri pudijlla shamunada kangunamu yachachishkaga na gentegunaj yuyillamunda llujshichisha yanga parlugunachuga. Ashtangarin Pai jatun poderyuj gashkadaga ñukuchij ñawindimi rikuganchi. ¹⁷Ima urami Paida allibi churasha Taita Dios jatunyachisha, "Kaimigun Ñuka k'uyashka Churi. Paibimi manchanaidi kushiyani," nisha yallimanaidi k'uilla Gajka chi shimidami uyachiga. ¹⁸Chi rimashka shimi jawa pachamunda uyarishkadaga, ñukuchilladimi Diosbujlla urkubi Paiyun gasha uyaganchi. ¹⁹Shina uyushami Dios nishkada parlujkuna ñuba esribishkaguna kabishkadi gashkadaga ashtandi alli alli yachanchi; chi parlushkagunadaga ansabi nina japichishka micha p'unllayachij shinada yuyusha chi P'unlla pakarimungama, shinaidi p'unllayanaj rikurij luzero kangunaj shungubi llujshingama, chi yuyillan gasha allidami ruranguichi. ²⁰Tukimunda yalliga kaidami yachananguichi: Dios esribichishkabiga Pai nishkada parlujkuna imalla parlashkagunadash ni pish na kikin yuyashkallada intindinachu gan. ²¹Dios nishkada parlajkunaga naidi paigunaj yuyillamunda imadash parlugachu, ashtangarin Diosbuj Espíritu kuyuchikimi Dios nishkadadi parlagaguna.

Lullasha yachachijkunamunda

2 ¹‘Dios nishkada parlujmi gani’ nisha llagmajkunaga Israel pueblo-bishmi tiyaga. Shinami kangunapurabish llagmusha yachachijkuna tiyaga. Paigonaga tukuchishtaj shujtij yachachinagunada pakallawadami waiguchingaguna. Paigonada randisha kishpichij Mandujlladatikish ‘Na rijsinichu’ nisha paigonallamundimi tukuchishtuj llakida ut’kada japingaguna. ²Shinaidi taugagunami paiguna pinganaidija rurashkagunallati rurusha katingaguna. Paigonaj kauzamundami kabishkada katina ñanga na valichisha rimashka tukunga. ³Paigonaga charij ganaida munasha kikin yuyashkallamunda yachachisha kangunamunda kuchkida surkungagunami. Shinagunamunga sarungunamundi llakichishka ganaga na yalli k’ipayashalla shamungami, paigonada tukuchishtushka ganash chaki katiriagundimi. ⁴Angelgunaidadikish juchada rurukiga Diosga na perdonashallami, ashtangarin uku pacha ninamu shitusha yanamangabi cadenan watushami paigonada llakichina p’unllagama wakichishka chariga. ⁵Ñau-ba p’unlla kausajkunadash Diosga na perdonashalla, ashtangarin maidash gachun kausujkunada manchanaidi tamiada kachushami kai pachadaga tapachiga. Shinash kabishkada ruranada yachi chayachij Noeda chaishuj kanchiskunandijlladami kausida wakichiga. ⁶Shinaidi Diosga Sodoma shuti Gomorra shuti pueblogunadash illujtada uchpayangama rupachisha tukuchingaj juchachishtuga.^a Naidi kazush nij k’ipalla kausujkuna chida rikusha ama shina layaidi tukuchunmi shina ruraga. ⁷Kabishkada ruraj Lot shutidami chi llakimunda llujshichiga; chi milliguna naidi alligunada ruragushkada rikusha manchanaidi llakirijkuga. ⁸Chi kabishkada rurajka paigonandi kausagushaga p’unllandija paiguna naidi alli rurushkagunada rikusha uyushash paibuj allilladi shungubimi llakilladi tukujkuga.

⁹Shinushami Mandajka Paida yuyilla gajkunadaga ima llakigunabi^b gakishe kacharichingu yachujmi. Shinaidi na kabishkada rurujkunamungarin Dios juchachina p’unllabi llakichingajmi wakichisha charigun. ¹⁰Yallidijka aicha munushkada rurusha milli munigunada mapayanagunadash katiguillagunamu shinaidi Mandaj nishkagunadash na kazush nijkunamumi chi llakichinaga shuyagun. Paigonaga pidash na manchusha kikin munashkaida rurajllaguna, jawa pachamunda k’uilla gajkunadash na valichisha rimanadash na manchungunachu.

¹¹Ashtanbish angelgunaga yalli jursan imadash rurajlla gashash shinagunadaga ‘Llaki tukushkanmu’ nisha juchachishamallah Mandujbuj ñaubuki na rimungunachu.

¹²Shina gakishe kaigunaga naidi intindij animalguna shina kausanshkhai kaususha, shinaidi japisha wañuchishtachunllami wacharishkaguna

^a 2.6 Gn 19.1-16,29 ^b 2.9 Santiago 1.2 ura chakibi yachachishkadash rikungui.

gan. Paiguna naidi intindishkagunamundash na valichisha rimanguna; shinaguna gashkamundaga animalguna layaidi paigunaj chingarina-llabidimi chingaringaguna.¹³ P'unllagunamash munashkaida rurusha manchanaidi kushilla sintishkamundaga tuki na allida rurushkamunda japinashkadaga japingaidimi. Kanguna tandanukushkagunabi mikugushash paiguna pandashkagunada rurusha manchanaidi kushikurishami millanaidi shinaidi mapaidijkunama shina ganguna.¹⁴ Wainayana yuyilla gashami majin warmida rikushash paimu munan. Juchada rurungu nai-di sajsungunachu, kaida chaida yuyarik'ichagujkunadami pandachingu katik'ichunguna, shungugunabiga shujbjuj charishkada munungu ninun-lladijkunamigun, shinaidi 'Na alli tukushkanmu' nishkagunami gan.¹⁵ Kabishka ñanmunda llujshisha kingu kinguda puringuna. Paigunaga Beorbuj churi Balaam sarushkalladati katijkunami gan. Chikuga na alligunada rurashkamunda kuchkida japingu manchanaidi munajmi gaga.¹⁶ Shinash juchada rurashkamundaga rimashkami gaga. Dios nishkada parlujtaga loco shina rurush katiguchun na sakish nisha upa gaj burrumi gente laya rimariga.^c

¹⁷Kai yachachijkunaga yaku illuj p'ugyugunami shinaidi pachundi wai-ra apush rishka p'uyu layagunashmi gan. Shinagunamunga manchanaidi yanamangabi shitanadaga ñami parijashkada charin.¹⁸ Paigunaga 'Allimi gani' nisha yanga shimigunaida parlarishami, pandarisha kausagujkunapuramunda chairitij llujshigujllagunada milli munigunada shinaidi aicha munashkaida rurachingudi katik'ichunguna.¹⁹ Paigunalladi tukuchi-shtushka ganamu ruragushkagunan watashka gashash 'Kacharichishun' ningunami. Tukigunami imallabish mishachijkja chi mishashkabujmi watashka shina tukun.²⁰ Ñukuchida Mandaj shinaidi Kishpichij Jesucristoda rijsishkamunda kai pachabi tiyaj millida ruranagunamunda llujshi pudijkunaga kutin ñaubia layaidi na alli ruranagunabi tsagnarij shina mishachijkja ñaubia ima laya na alli kausashkadarash ashtan yallimi tukun.²¹ Dios munushka shina kausana ñanda rijsishka jawash Paimunda japistika mandashkamundash kutin washamu vueltana randiga, chi ñanda paiguna naidi rijsishkashami alli ganmuga.²² Shinusha proverbiobi kabishkadadi nigushaga, "Achkuga pai shungu shitashkaidadimi kutin mikun,"^d shinaidi, armushkalla k'uchish kutinmi lodollabidi pelotarin," nishkaga paigunabi p'aktashkadi tukun.

Mandaj Jesús kutin shamunamunda

3 ¹K'uyashkagunalla, kaiyunga ishki kutinmi kangunamu cartada escribini. Chi ishkigunallabidimi kangunaj yuyi linshu kabishkadi gachun takush nisha escribiskani. ²Diosbujlla gaj Pai nishkada

^c 2.16 Nm 22—24; Jud 1.11 ^d 2.22 Pr 26.11

parlujkuna ñaubamu parlashkagunada yuyarichun shinaidi apostolguna kangunamu Mandaj Kishpichij mandashkada yachachishkadash yuyarichunmi nini.³ Tukimunda yalliga kaidati yachanami ganguichi: asijkuna shamusha tukuri p'unllagunabiga kikin milli munigunan puringaguna.⁴ Shinaidi paigonaga, “Cristo ‘Kutin shamushami’ nishkaga ¿imachari tukugun? Ñukuchij taitaguna ña chingarishka gakish Dios tukida rurungu kallarishka p'unllamunda kunungama shina layaidi katigunllami,” nisha tapungagunami.⁵ Paiguna shina nigushaga Dios rimarishkallan jawa cieloguna^e chibi ima tiyashkada ñaubamundadi rurushkada shinaidi kai pachadash yakumunda ladunchisha yakullamundadi tiyachun rurushkadaga alli juilluidimi na cuenta kush ninguna.⁶ Chillamundatimi ñaubamu tiyaj kai pachadaga yakullandi tapachisha tukuchishtushka gaga.⁷ Dios rimarishkallamundadimi kunun tiyaj jawa pachash kai pachash ninan rupachishka gachun wakichishka tiyagun. Dios juchachina shinaidi maidash gachun rurujkunada tukuchishtana p'unllajmi chigunga wakichishka gan.

⁸ Ashtanbish k'uyashka wauki paniguna kaidash ama kungarichichu: Mandajmuga shuj p'unllaga waranga (1.000) wata shinami gan, shinaidi waranga wataga shuj p'unlla layallami gan.⁹ Shujkuna ‘K'ipayashka’ nisha yuyashka shinaga Mandajka Pai ‘Shamushami’ nishkadaga narij p'aktachishash na k'ipayagunchu, ashtangarin Paiga pish ama wañuchun nisha ashtanbish juchada sakisha Diosmu vueltachun nishami kangunada gushtulla shuyagun.

¹⁰ Shina gakish Mandajbuj p'unllaga shuwa laya shamungami.^f Chi ratumi jawa cielogunash manchanaida gulun nisha chingaringa; imalla tiyashkagunash ninabi rupasha tukuchishtashka ganga, shinaidi kai pachash chibi imalla rurushkagunandijmi rupachishtushka ganga.^g

¹¹ Shinami tuki kaigunada llujshichishtushka ganaidi gashkakiga, Dios yuyilla gasha shinaidi ima juchash illuj ¡¿nachu kausanaidi gan-guichiri?!¹² Diosbuj p'unlla shamenada chapagusha chi p'unlla ut'kada chayamuchun pudishkada ruragiuchi. Chibimi jawa cielogunadash ninan japichisha tukuchishtuki chibi imalla tiyashkash rupachiki yakuyanga.¹³ Shinash ñukuchiga Dios ‘Kushami’ nishka shina jawa cielogunadash kai pachadash mushuitami shuyagunchi; kabishkada ruranaga chibimi tiyagungalla.¹⁴ Shinusha k'uyashkagunalla, shina tukuchun shuyagushkamundaga ima mapash illuj ima juchash illaj alli k'uilla kausagulta Dios japichunga tuki pudishkada rurichi.¹⁵ Shinaidi Mandaj Jesús ñukuchida

^e 3.5 Jawa cieloguna nigushaga p'uyugunama indima lunama luzerogunama ima tiyashkagunaj pushtugundami nigin. ^f 3.10 Mt 24.43; 1Ts 5.2,4; Ap 16.15 ^g 3.10 *rupachishtushka ganga* – Nauba escribishkagunabiga, maijingunagarin, “japishkami ganga,” nishallami ninguna.

gushtulla shuyagushkaga gentegunada kishpichingudi gashkadaga alli yuyarichi. Kaigunallamundadi ñukuchi k'uyashka wauki Pablosch Dios paidaga alli yachajta ruruki kangunamu ña escribishkami. ¹⁶Paiga tuki cartagunabi kaigunamundami parlan; chigunabiga parti pushtugunada intindinaga jinchi gakimi imash na intindijkunash kaida chaida yuariik'ichajkunash ishtuda yachachin; shina layaidimi Dios escribichishka chaishuj escribishkagunanbish paigunalladi tukuchishtaringu ruran.

¹⁷Shinakiga k'uyashka wauki paniguna, ñaubamu kaida yachushkamundaga, millida rurujkuna pandashka yachachishkabi ama aisushka gangujka kunungama jinchilladati shayarigushkamunda ama urmungaj yuyin ganguichi. ¹⁸Chibuj randiga ñukuchida Mandaj shinaidi Kisipichij Jesucristoda ashtan ashtan rijsisha Pai kushka alligunabi iñarisha katichi. ¡Kununbish shinaidi na tukuringama Paiga 'K'uillami ganguí' nishka gachun! Shina gachun.